

En regurdientscha da

GR 21-6-83

Georgina Monn-Maissen, Rueras



(G.F.) En tun lamentont ha il zenn annunziau ils 22 da matg la mort da nossa convischina Georgina Monn-Maissen. Ella ei spartida ella casa da s. Vigeli a Sedrun. Naschida eis ella calonda november 1899 a Surrein/Sumvitg sco tiarza da 7 fargliuns. Ses geniturs ein stai: Giachen Placi Maissen e Maria Ursula, nata Bundi. El ravugl d'ina famiglia purila ha Georgina passentau sia affonza cun buns geniturs e fargliuns. Las relaziuns eran lu semplas, ils onns maghers, las entradas pintgas. Aschia ein ils affons vegni tratgs a spargnusadad ed educai d'esser cuntents cun quei ch'ins veva.

Ils onns da scola vargan, quels da

giuventetgna arrivan. Sep Antoni Monn, daventaus memia baul vieus, damonda pil maun dalla Georgina. 1930 van els ensemens agl altar. A Rueras entscheivan els da cumionza a cultivar ils bials praus artai. Omis-dus preferevan la clamada purila. La lètg ei stada benedida cun 7 affons: 3 buobs e 4 buobas. E quels ein stai la legria dils buns geniturs. Els ein vegni educai en mudestas relaziuns alla cardientscha artada. Culs onns vegnan era quels gronds e sgolan ora. Mo in resta cun bab e mumma. Ils ulteriurs fagevan da temps en temps viseta.

Dunna Georgina era ina femna luvrusa cun ina energia da fier. Ed ina cantadura excellenta. Cul temps ein ils buns geniturs sedecidi da dar giu il fatg puril al fegl Stiafen. 1975 van ils consorts en Casa s. Vigeli a Sedrun. Las soras fagevan bien cun els. 1978 miera il bien consort da Georgina. Igl ei stau ina greva frida. La Georgina entupavan ins adina puspei sin sias spassegiadas, schegie che la vesida vuleva disdir empau.

Da Tschuncheismas ei il fegl vegnius ed ha priu la mumma per ir a gentar da cumionza en in hotel a Sedrun. Denton, sil retuorn alla Casa s. Vigeli arriva la freida mort. In tal comiau ei grevs. Ils 25 da matg han ins surdau las restonzas terrestras alla fossa. Leu spetga la Georgina silla levada gloriusa. Ella ruaussi en pasch. La glisch perpetna sclareschi a tuts nos defuncts. Als restai anavos nossa sincera condolentscha. RIP!